

EcoGas ta lamenta alegacion incorrecto di Minister Otmar Oduber



ORANJESTAD - Recientemente Minister Otmar Oduber a haci algun expresion incorrecto, entre otro tocante e acuerdo di tipping fee entre EcoGas y Serlimar. Contrario na su ponencia, Minister Oduber mes ta esun cu personalmente a negosha e acuerdo aki. Por medio di un accountant asigna pa e Minister y EcoGas conhuntamente, a yega na e acuerdo mutuo entre EcoGas y Serlimar pa e tipping fee di Afl. 120.00 pa ton pa procesamiento/separacion di sushi municipal den envirobales.

Segun e comunicado cu Bon Dia Aruba ricibi ta bisa cu, e realidad ta cu e procesamiento y separacion di desperdicio municipal na EcoGas ta costa mas cu simplemente tira e desperdicio curu riba dump sin procesa esaki, manera tabata wordo haci antes.

No ta corecto cu EcoGas a triplica e tipping fee manera e Minister ta alega. Es mas, EcoGas a ofrece pa haci e deramento di envirobales pa un suma di Afl. 18 pa ton y ta e mesun Minister a subi'e te na Afl. 60 florin pa ton y tambe a dicidi pa laga un otro compania di transporte haci e trabou ey en bes di uza Serlimar mes pa por haya e entrada extra aki.

Asina e Minister mes a yega na e suma di Afl. 180 pa ton y a stipula esaki den articulo #9 di e contract, obligando EcoGas pa cobra e tarifa aki na tur instancia, incluyendo Ecotech, Serlimar y tur otro cu lo mester hiba nan sushi na EcoGas pa wordo procesa.

EcoGas ta lamenta e alegacion incorrecto di e Minister. EcoGas ta trahando cu e meta di maneha e desperdicio na Aruba na un manera duradero y ta cla pa sigui cu esaki hunto cu e Minister y Serlimar.